

**Nunat Avannarliit Killiit Siunnersuisooqatigiiffiata aalajangersagaa nr. 3/2009 Inatsisartunit taperserpeqarnissaa pillugu Inatsisartut aalajangiiffigisassaattut siunnersuut, aalajangersagaaq ima oqaasertaqarpoq:**

**Nunani avannarlerni killerni ilinniarsimangitsut atuagarsorlutik ilinniartinneqarnissaat, inuussutissarsiutinut ilinniartitaanerit sulinermillu misiliinerit pillugit nunat avannarliit killiit suleqatigiinnerata annertusarneqarnissaanut Islandimi naalakkersuisut, Savalimmiuni naalakkersuisut aammalu Kalaallit Nunaanni naalakkersuisut tapeeqataanissaat Nunat Avannarliit Killiit Siunnersuisooqatigiiffiata siunnersuutigaa, taamaalilluni inuit universitetimi ilinniarsimangitsut ilisimasaminnik piginnaasaminnillu annertusaasinnaaqullugit taamaalillutillu inuunermi atukkaminnik pitsanngorsaasinnaaqullugit suliffissaqarnikkullu periarfissaqarneruleqqullugit.**

**Kingusinnerusukkut nassuiaammi isumassarsianut naapertuuttumik nunat avannarliit killiit akornanni suliassaqarfiup tamatuma iluani misiligummik suliniutinut aningaasatigut tapiissuteqarneq aqutugalugu taama suleqatigiinnermik aallartitseqqullugit Nunat Avannarliit Killiit Siunnersuisooqatigiiffiannit nunat kaammattorneqarput.**

(Josef Motzfeldt, aallartitat siulittaasuut)

### **Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

### **Siullermeerneqarnera**

Suleqatigiinneq inuiaqatigiinnut iluaqutaasooq sunaluunniit Naalakkersuisut akuersaarpaat.

Minnerunngitsumik (nunani tamalaani) nunani avannarlerni killerni suleqatigiinneq inuiaqatigiit akornanni attaveqarnermut nukittorsaataasinnaasooq suleqatigiinnermilu susassaqtartunut tamanut iluaqutaasusaaq Naalakkersuisut akuersaarpaat.

Siunnersuuteqartumit aalajangiiffigisassatut siunnersuutigineqarpoq Nunat Avannarliit Killiit Siunnersuisooqatigiiffiata aalajangersagaa nr. 3/2009 taamatullu inunnut atuarunnaarsimasunut suliampilu ilinniagaqanngitsunut ilinniartitaanikkut neqeroorutit pillugit nunat avannarliit killiit Islandip, Savalimmiut Kalaallit Nunaatalu suleqatigiinnerisa annertusarneqarnissaat Inatsisartunit taperserpeqassasut.

Nunat Avannarliit Killiit Siunnersuisooqatigiiffiata siunnersuutaata imaraa inunnik killilimmik ilinniarsimasunik suliatigullu sungiusarsimasunik ilinniartitsinermut ataatsimoorussamik pilersaarusiornissaaq ungasinnerusoq eqqarsaatigalugu ilinniartunut paarlaaqatigiittarneq neqerooruteqartarnerlu kiisalu ilinniartitsisussaaqarneq pillugit misiligutitut suliniummik pilersitsinissap ajornarunnaarsinneqarnissaa siunertaralugu.

Siullermik siunertaavoq inuusuttut ilinniarsimangitsulluunniit tallimat arfineq marlulluunniit kiisalu ilinniartitsisualuit Kalaallit Nunaanneersut Savalimmiuneersullu ilinniartitit ineqarfiani nerisaqarlutillu najugaqarlutik ukiumi ataatsimi ukiulluunniit affaani Isafjordur Gymnasiumimi inuussutissarsiutinut immikkoortortamiinnissaat.

Suliniummik suleqatigiissuteqarnermi susassaqtut tamarmik misiligutitut suliniummut aningaasatigut allatulluunniit tapersiinnaat naatsorsuutigineqarpoq.

Pingaartumik nunani avannarlerni killerni suliaqarfinni arlalippassuarni maanna suliffissaaleqiffioqisumi ilinniartitaanermut piginnaasanillu ineriartortitsinermit tunngasuni ilinniarsimannigitsunut suleqatigiissuteqarnissaq ataatsimullu suliniarnissaq pillugu Naalakkersuisut siunnersuuteqartoq isumaqatigaat.

Naluneqanngitsut innuttaasut sapinngisamik amerlanerpaat pitsaanerusemik inuuneqalernissamut suliffissaqarnissamullu piomassuseqalersinniarlugit innuttaasut piginnaasaasa ilinniartitaanikkut piginnaasanillu ineriartortitsinikkut nukittorsarneqarnissaat siunertaralugu nunatsinni suliniuteqartoqareeqaaq.

Minnerunngitsumik inuiaqatigiinni ilinniarsimannigitsorpassuit pilersaarut PKU-mik (Projekt Kompetenceudvikling for Ufaglærte/Ilinniarsimannigitsut piginnaasaqarnerulernissaat siunertaralugu suliniut) taaneqartartoq aqutugalugu piginnaasanik ineriartortitsinissaq siunertaralugu sammeneqarput. Inuit taakku amerlanersaasa piginnaasaqarnerulersinniarneqarnissaat anguniagaavoq.

Pingaartuavoq suliniutit pitsaasut, suliffissaaleqinerup akiorniarnernik imaqtut, inerisartuarnissaannut periarfissiinissaq. Tamatumani Nunat Avannarliit Killiit akimorlugit suleqatigiinneq ikorfartuutaasinnaavoq, assersuutigalugu Savalimmiut annermillu Islandip misilittagaasa atorluarnerisigut.

Taamaattumik nunat avannarliit killiit akornanni inuusuttut ilinniartitsisullu paarlaasseqatigiittarnissaat pillugu suliniummik suleqatigiissuteqarnissamik siunnersuut tamanna Naalakkersuisut taperserpaat siullermillu Nunat Avannarliit Killiit Siunnersuisooqatigiivisa nassuiaataat suleqatigiinneq pillugu isumassarsianik imalik misissussallugu kingornalu suleqatigiinnerup aningaasaqarnikkut nunatsinnut kingunerisassaasa annertussusaat misissorumaarlugu.

Taamaattorli ilinniartitaanermut pilersaarummut aningaasaqarnikkut killilliussani misiligutitut suliniummut aningaasatigut tapiisinnanissaq Naalakkersuisut naatsorsuutigaat.

Tamatumunnga peqatigitillugu ilisimatitsissutigineqassaaq nunatsinni maani sumiiffimmi sumi ilinniarnissaq nammineq toqqarneqarsinnaammatt taamaattumillu misiligutitut suliniummut peqataaratarsinnaasut ilinniagaqarnerisuteqaannarlutik Islandiliarsinnaallutillu Savalimmiuliarsinnaammata.

Qulaani taaneqartut tunngavigalugit Naalakkersuisut inassutigissavaat Inatsisartut Nunat Avannarliit Killiit Siunnersuisooqatigiiffiata aalajangersagaanut nr. 3/2009-mut tapersiinnaannik siunnersuut akuerineqassasoq.